

A SU LETORE

Ca naschidu non so in Logudoro,
Marghine, Meilogu ne Anglona,
non so chirchende de laru corona
ne madaglias de brunzu, prata e oro.

Ma si da minoreddu tenzo in coro
sas noe verginellas d'Elicona,
letore caru! Iscusa e perdona
si non so dignu de s'amore issoro.

Duncas, si t'inchietas ti cumprendo
e si t'indignas pro s'opera mia
ca onores e bantos non pretendo.

Si credes chi est una porcheria,
non tenzas piedade! No m'ofendo,
pro chi mi ghetes s'arga de sa via.